

Da la cristianisaziun al temp medieval tardiv

Istorgia da las baselgias dal Grischun, 1. part

■ **La cristianisaziun da la Rezia n'è betg stada in process linear: ils conflicts cun il pajanissim roman e pli tard cun quel german han chaschunà regress e retardaments.** La preschientscha da quel sa reflectescha anc en ils scumonds dad isanzas pajaunas, relaschads en la «Lex Romana Curiensis» da l'emprima mesadad dal 8avel tschientaner ed en ils chapitels da dretg da l'uestg Remedius («Capitula Remedii» da ca. l'onn 800), ma era en las isanzas popularas reticas anc attestablas per il temp modern tempriv (cults da l'aua, dal fiu, dal crap, da plantas, da champs sco era dad animals e da la fritgavladad) che derivan da concepziuns religiusas primitivas. Las Vitas dals ss. Gaudentius, Gliezi/Luzi e Florin tradeschan pauc dal process da cristianisaziun. Statuetas da songts, altars ed inscripziuns sin altars en las baselgias da Cuira (S. Steivan, S. Gliezi), da Segl-Baselgia e da Buond-Muraia dattan perditga da concepziuns da dieus pajaunas, tgiradas en la Rezia romana, e las testimonianzas archeologicas da Panaduz, d'Aschera e da Cuira renvieschan a l'emprima fasa da la cristianisaziun da la Rezia enturn l'onn 400. A Ziraun sa chattava dapi il 5avel tschientaner ina baselgia baptismala, ed il cuvel pajaun al sid da la vischnanca è probablament vegn destruid da cristians (pir) en il 6avel/7avel tschientaner. A Cuira, il center da la provinza Rezia, è attestà il cristianissim tras l'uestg Asinio (451) e tras ils edificis cultics dal temp cristian tempriv. L'emprima catedrala, ina baselgiasala cun in local transversal ed in'apsida meda radunda, è vegnida construïda en l'emprima mesadad dal 5avel tschientaner. Da memorias dal temp roman tardiv (baselgias commemorativas da songts) èn resoridas las duas baselgias vischinantas da S. Steivan e da S. Gliezi.

Dal progress da l'organisaziun ecclesiastica sin la champagna, inizià tranter l'antica tardiva e l'emprima mesadad dal 9avel tschientaner, dattan perditga las baselgias fundadas en il temp medieval tempriv. Enturn l'onn 800 existivan ca. 230 chasas da dieu entaifer la diocesa da Cuira – in dumber elevà en consideraziun da la rara colonisaziun. La provinza Rezia appartegnava ecclesiasticamain a l'archuevestgieu da Milaun, ma a partir da ca. l'onn 600 è l'influenza franca da daventa-

da pli e pli ferma. Quai sa manifestescha per exempel en la reuniun da la pussanza seculara ed ecclesiastica en la famiglia dals Zaccons/Victorids (sco en la Gallia merovingica). Il Contract da Verdun (843) ha suttemess la Currezia definitivamain a l'Imperi dals Francs orientals. L'uestgieu da Cuira è vegn separà da Milaun ed attribuid a l'archuevestgieu da Magonza. En il temp carolingic tardiv è l'uestgieu da Cuira vegn integrà en il svilup dal dretg da la baselgia imperiala franca. L'onn 849 ha l'uestg Esso inizià a Cuira la lingia dals uestgs cun nums tudestgs. Era quest fatg reflectescha la nova orientaziun vers il nord. Ils uestgs èn vegnids incumbensads cun la defensiu cunter ils inimis exteriurs (Ungaris e Saracens) ed èn vegnids rinforzads da lur vart dals imperaturs sco pitgas cunter la noblezza seculara. Uschia èsi reussì als uestgs da recuperar en il 10avel tschientaner ina part dals bains attribuids tras la Divisio als possess imperials tras donaziun (Otto I, 955, 958, 960) u barat e da schlargiar lur possess (per exempel a Meraun, a Bludenz, en la Bergaglia ed en il Schons). Enturn il 960 era la Rezia separada en numerus complex signurils sco ils contadis da la Rezia Sut, da la Rezia Sura e dal Vnuost ed ils territoris d'immunitad da las claustras da Faveras, Mustér u Son Gagl. L'uestg Hartpert era perquai ina pitga fitg impurtanta en la politica exteriura (en l'Italia), proseguida da l'imperatur Otto I.

Las claustras temprivas en Rezia

La Rezia è vegnida cristianisada a partir dal sid, la vita monastica percenter deriva dal vest. Las claustras giugavan ina rolla da temprina plitost politic-culturala che missionara. L'abazia da mungias da Cazas (ca. 700) è stada probablament la fundaziun claustrala la pli veglia entaifer l'uestgieu da Cuira, suttemessa da bell'entschatta a l'uestg da Cuira. Il medem vala era per la claustra da mungias a Mistail (*Wapitinis*), fundada ca. l'onn 800. Da numnar è era l'abazia da Schänis/SG, fundada probablament tranter il 814 ed il 823 da Hunfrid al cunfin tranter la Rezia Sura e Sut. La fundaziun da las trais claustras da paders a Mustér, Faveras e Müstair è enconuschenta mo tras intginas paucas funtaunas, per grond part tardivas. Quella da la claustra da



Baselgia da l'antier ospizi da S. Romerio a Brusio, custodi d'in convent d'augustins (enturn 1100).

FOTO PD

Mustér è vegnida iniziada presumablament cun l'activitad da l'eremit francon Sigisbert, sustegnì da Placi (Placidus), probablament in Ret. Forsa aveva già il pres Victor (ca. 720/730), en mintga cas però ses figl Tello, fatg a la claustra da Mustér ina donaziun extendida (765). Ils Zaccons/Victorids han probablament influenzà era la fundaziun da la claustra da Faveras (ca. 740), e paders da Faveras pudessan avoir contribuì a la fundaziun da la claustra da Müstair (*Tuberis*). Decisiv è però stà l'uestg Constantius ubain Remedius. Carl il Grond compare pir en il 12avel tschientaner sco «fundatur» da la claustra. La baselgia claustrala odierna e restanzas da l'implant entir derivan dal temp da fundaziun.

Il pli tard dapi la Divisio han las trais claustras numnadas appartegnì directamain a l'Imperi francon: il 950 ha Otto il Grond renovà l'immunitad da Faveras; Mustér ha obtegnì il 960 dad Otto I il dretg d'elegir libramain l'avat ed il status d'ina claustra imperiala, e differentas donaziuns han alura rinforzà questa claustra sco guardia al Pass dal Lucmagn. A la claustra da Müstair però n'èsi betg reussì da mantegnair il status d'ina claustra imperiala: ella è stada e restada dapi il 881 in'atgna claustra episcopala. Pir en il decurs dal temp carolingic è probablament entrada la regla benedictina era en las claustras reticas. Las claustras han dà a la Currezia novs impuls religius, cultural, politics ed economic. Pensain per exempel a las runcadas u als manuscrits pumpus dals scriptoris claustrals per la liturgia, la teologia e las contemplaziuns spiritualas sco era per fatgs giuridics ed administrativs. Menziun speziala merita il «Liber Viventium» da Faveras (suenter 800) sco product d'ina excellenta prestaziun artistica. Las numerusas picturas muralas da la baselgia claustrala da Müstair offeran cun ca. 100 maletgs in'unitad unica da picturas carolingicas. A la fin dal 9avel e 10avel tschientaner eran tut las claustras reticas suttemessas ad ina regressiu marcanta dal dumber da paders e da mungias. En il 12avel tschientaner ha l'Urden premonstratens inizià ina segunda unda da fundaziun da claustras: quella da S. Gliezi/Cuira e da Curvalda. Ils urdens dals paders mendicants eran represchentads en Rezia mo tras ils dominicans a Cuira (a partir dal 1277).

Ils pli vegls patrocinis da las baselgias curretticas derivan dal sid (Ambrosius da Milaun, Carphorus e Cassian dad

Imola, Eusebius da Vercelli, Proculus da Verona), quels temporarmain pli tardivs per regla dal vest (Martin da Tours, Hilarius da Poitiers, Amandus da Maastricht-Tongern, Medardus da Soissons). Il dumber da songts da la diocesa è pitschen, e lur patrocinis èn limitads al lieu da lur activitad: Florin/Ramosch, Gaudentius/Casaccia, Placi/Mustér, Gliezi/Cuira, Fläsch e Wangs. Ordaifer las cuminanzas monasticas sa manifestava la vita religiusa oravant tut en ils pelegriunadis tar quests songts populars ed en ils usits sepulcrals documentads tras l'archeologia. La diocesa da Cuira cumpigliava l'actual chantun Grischun, la Val d'Ursera, la regiun da Sargans, la part meridionala dal Vorarlberg ed il Vnuost; il Puschlav sustatteva a l'uestg da Com. Ella consistiva da decanats che correspundevan a las grondas valladas e ch'eran probablament plaivs grondas. Ma per bier betg tut las baselgias medievalas eran baselgias parochialas. Las associaziuns persunalas da las plaivs pli veglias èn sa transfurmas successivamain en associaziuns territorialas, e la delimitaziun colliada cun quella ha manà anc avant l'onn 1000 a la furmazion d'in sistem da plaivs pitschnas (baselgias filialas). Il sistem da las baselgias privatas è sa sviluppà en Rezia pir suenter la Divisio: *religiosi homines* han fundà claustras finanzadas cun lur facultad privata. In exempel è la claustra da Schänis sco abazia privata da Hunfrid e da ses ervals (fin il 1045).

Adolf Collenberg

Baselgias e claustras dal 13avel tschientaner fin a la reformaziun

Era en il temp medieval tardiv han giugà las claustras ina rolla impurtanta per l'organisaziun ecclesiastica a l'intern da la Rezia. La claustra da Mustér ha erigi da la vart nord dal Lucmagn plirs ospizis. En la Val dal Rain Antierur èn vegnidas incorporadas il 1491 nov pravendas a l'abazia. En stretga colliaziun cun Mustér stevan en il 13avel e 14avel tschientaner ina cuminanza da beghinas e begards en vischinanza da la chaplutta da S. Benedetg/Sumvitg. Suenter il declin da la claustra da paders a Müstair en il temp autmedieval ha existì qua a partir da la mesadad dal 12avel tschientaner in convent da benedictinas che furmava en il temp medieval tardiv in center da la mistica eucaristica (veneraziun dal Sontgissim Sang). Las preposituras premonstratensas da S. Gliezi/Cuira e da

Curvalda èn daventadas abazias enturn la mesadad dal 15avel tschientaner. A tuttas duas ha appartegnì fin viaden il 14avel tschientaner in convent da mungias, a quella da Curvalda ultra da quai, sco claustra filiala, la prepositura da S. Giachen/Claustra. La suletta fundaziun claustrala dal temp medieval tardiv en Rezia è stada quella da S. Nicolai a Cuira. La claustra da dominicans è vegnida fundada tranter il 1280 ed il 1299 sin iniziativa da l'uestg ed ha giugà ina rolla impurtanta en il svilup da la colonia da Cuira: qua èn sa constituidas las confraternitads laicas e qua han celebrà represchentants da la noblezza bassa e mastergnants lur messas da morts.

La fundaziun da novas baselgias era l'emprim oravant tut chausa dals signurs feudals che possedeven solitament era il dretg da patronadi. Lur piazza ha surpiglià en il 15avel tschientaner la raspada organisada en associaziuns territorialas: vischinanzas han fundà en il 15avel tschientaner ina tschientina da chapluttas e pravendas. Talas fundaziuns han manà a la constituziun da novas plaivs. Las vischinanzas aspiravan en ina emprima fasa ad in'atgna pastoraziun locala, pli tard era a dretgs patronals. Dapli d'in quart dals plevons en uffiz cumpain vegniva custodi enturn il 1500 da fundaziuns communalas. En dapli d'in tschintgavel dals cas partecipavan ils parochians organisads en vischinanzas a la tschera dals plevons ed en dapli d'in terz dals cas controllavan els l'administraziun dal bain da la pravenda. Daspera existivan – sco corporaziuns spiritualas – il convent d'augustinas a Cazas, il convent collegiat a S. Vittore/Mesauc sco era ils ospizis a Chapella/S-chanf (fundà da la pravenda da Zuoz) e da S. Romerio/Remigio a Brüschen (custodi d'in convent dad augustins). Quests dus ospizis èn vegnids bandunads a l'entschatta dal 15avel tschientaner.

Florian Hitz



Illustraziun or dal «Liber Viventium» da Faveras (enturn 800).

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.